

CEDE Aruba ta lansa su plan di maneho nobo

ORANJESTAD- Durante un conferencia di prensa, CEDE Aruba a presenta su website nobo www.cede-aruba.aw cu informacion importante pa organisacion no gubernamental ariba tereno social, educativo y recreativo. Banda di esaki a presenta un plan integral cu prioridadnan ariba tereno social. E plan di maneho integral di CEDE Aruba lo enfoca ariba desaroyo di bario y sociedad, reforsa individuo y famia, desaroyo di mucha y hoben, participacion di hende grandi y hende cu limitacion y otro grupo sensibel. E lema di e plan aki ta dialogo, cooperacion y sinergia.

CEDE Aruba ta un organizacion di desaroyo y co financiamiento cu ta sostene programa y proyecto di NGO's den sector social. Na Aruba tin hopi NGO, tur fundacion of asociacion, cu ta haci esfuerso pa mehora e provisionnan pa bienestar den comunidad Arubano. CEDE Aruba ta yuda e NGO's cu desaroyo y financiamiento di tur sorto di proyecto duradero. E reto grandi ta cu tin mas cu 200 NGO's cu ta activo na e momento aki, p'esey CEDE Aruba ta bay enfoca mas ariba cooperacion, dialogo y sinergia. Den esaki CEDE Aruba ta bay tuma un papel activo, esta trece organisacionnan hunto, stipula prioridad conhuntamente y desaroya programa y proyecto en cooperacion cu otro. Un meta importante ta pa yega na miho cooperacion entre NGO's, entre NGO's y departamento di gobierno y entre NGO's y sector priva. Durante e siguiente 6 aña CEDE Aruba lo enfoca ariba e siguiente temanan.

Desaroyo di bario y sociedad

Pa CEDE Aruba ta importante pa stimula un dinamismo entre hende den diferente bario y sociedad completo. Aruba tin hopi iniciativa, entre otro di hopi grupo informal dentro di nos comunidad. Den cuadro di e tema Bario&Sociedad CEDE Aruba kier dirigi su mes entre otro riba estimulacion di centro di bario, sostene actividad pa diferente gruponan den e bario y encera algun bario cu ta mas isola den su totalidad. Y ademas CEDE Aruba kier lucha pa e fortificacion di trabou boluntario y e posicion di boluntario den sociedad.

Reforsa individuo y famia
Famia ta e piedra di skina di nos sociedad. Pero e estructura di famia a cambia considerablemente durante ultimo decadan, entre otro a consecuencia di aumento di divorcio y migracion. Famiannan mas y mas ta bou presion y ta menos capacita pa ehersce nan funcion di cuido. Den cuadro di e tema individuo&Famia CEDE Aruba ta sostene iniciativa dirigi riba fortificacion di e posicion economico di famiannan, crea un ayudo coherente pa mayornan y educadornan y reforsa cuido di famia. P'esey educacion pa adulto y realizacion propio ta hunga un rol importante den esaki.

Desaroyo di mucha y hoben

Muchanan y hobennan ta forma e generacion di futuro. Den e cuadro aki ta importante pa mas trempa posibel stimula un desaroyo positivo y preveni problema. Pa e gruponan mas hoben CEDE Aruba ta sostene proyecto cu ta dirigi riba prevencion trempa. Si ta trata di hoben CEDE Aruba ta dirigi su mes riba proyecto cu ta dirigi riba

habilidad pa defensa propio, desaroyo di caracter, pasa tempo liber na forma consciente y liderazgo hubenil. Pa fortifica e amor propio di hoben y promove e firmesa ta mes importante.

Hende grandi y hende cu limitacion

Pa CEDE Aruba ta importante cu tur hende por participa den nos sociedad. Hende grandi y hende cu limitacion riba hopi tereno tin e mesun retonan, en particular si ta trata e infraestructura den nos sociedad. CEDE Aruba ta sostene iniciativa cu ta dirigi riba integracion di hende grandi y hende cu limitacion. Ademas CEDE Aruba ta sostene proyecto dirigi riba active aging, participacion di hende grandi y mehora e estructura di cuido di hende grandi. Den e grupo di hende cu limitacion CEDE Aruba ta dirigi su mes entre otro riba (re) integracion riba mercado laboral y fortifica e sistema di cuido (diario).

Gruponan sensibel

E diferente gruponan sensibel semper ta haya mas atencion den e maneho di CEDE Aruba. Por pensa riba diferente grupo di riesgo den nos sociedad, manera ex - prizonero, muchanan cu ta laga scol sin logra gradua, mayornan hoben, hende cu problematica di droga, y migrante. E iniciativanan cu nos ta sostene riba e tereno aki ta dirigi riba un trabou y trato coherente di e gruponan aki, na unda bolbe integracion y participacion ta e metanan mas importante.

Fortificacion di NGO

Pa CEDE Aruba ta hopi importante cu e sector di NGO bastante hancha na Aruba ta wordo constantemente re-

forsa. P'esey CEDE Aruba ta bay dirigi su mes mas riba sosten structural di NGO. Esaki por inclui dianan di estudio regular dirigi riba aspecto di maneho manera desaroyo di maneho, skirbi file di proyecto, pone un administracion efectivo, mercadeo efectivo y uzo di social media, etc. Banda di dianan di estudio CEDE Aruba tambe por organisa curso y training pa gruponan mas chikito, y trayectonan di consulta mas intensivo tambe ta posibel. Ta haci uzo di servicio di experto externo pa esaki.

Website

Ariba e website nobo www.cede-aruba.aw_publico general por haya hopi mas infor-

macion over di e trabounan di CEDE Aruba den tres idioma, esta Papiamentu, Hulandes y Ingles. E website ta duna informacion tocante mision, vision, meta, maneho y tur procedura y criterio pa por haci un aplicacion pa financiamiento. CEDE Aruba ta purba di traha mas digital posibel, pues por download e formulario di aplicacion y entrega proyecto via mail. Pa cualkier informacion por yama nos na 582-7666 of manda mail pa medio di e website.

CEDE Aruba ta gradici tur organizacion cu a coopera pa yega na e plan aki, entre otro Departamento di Asunto Social, SER, CBS, KVK y tur NGO's. □